


Radøy kommune
Meland kommuneDato: 23.12.2016
Vår ref.: 2016/34919-2
Sakshandsamar: Endre Korsøen
Telefon: 917 64 632

Lingalaks AS org. nr. 960900626 - Søknad om utviding og endra plassering av anlegg for oppdrett av matfisk av laks og aure på lokalitet Toska Sør i Radøy kommune

Hordaland fylkeskommune sender med dette kopi av komplett søknad motteke 22.12.2016 frå Lingalaks AS om løyve til auka maksimalt tillaten biomasse (MTB) og endring og flytting av anlegg for oppdrett av matfisk av laks og aure på lokalitet 14018 Toska Sør i Radøy kommune.

Lokalitet 14018 Toska Sør er godkjent for oppdrett av matfisk av laks og aure med ein maksimalt tillaten biomasse (MTB) på 1560 tonn. Godkjent anlegg består av eit kompakt stålanlegg med 6 bur, samt ein forflåte. Samla nyttar noverande installasjonar omlag 6 dekar overflateareal.

Lingalaks AS søker no om ny lokalitet om lag 500 meter lenger sør. Dette anlegget skal kome til erstatning for eksisterande lokalitet Toska Sør. Det vert søkt om å få klarert areal for utlegging av 10 rammebur a 100x100 meter i 2 rekker. Omsøkt areal er om lag 100 dekar. Fôringsflåten er søkt plassert nordvest for merdanlegget. Kartet under syner omsøkt anleggsplassering.



Verksemda søkjer om utviding i MTB i anlegget frå 1560 tonn til 3620 tonn.

Som bakgrunn for søknaden oppgjev Lingalaks AS følgjande:

«Bakgrunnen for søknaden om endring av posisjon for anlegget er for å gje betre miljøtilhøve på lokaliteten for å tilpasse oss tiltakspakke mot sjukdom, som er føreslegen. Vedlegg 6.3.1 viser bakgrunn for risikovurdering angående posisjonering av anlegg langs kontra på tvers av strømrertrning. I soneinndelinga som er iverksatt kjem Toska S til å bli ein svært viktig lokalitet for Lingalaks AS, og ved endring av posisjonen vil dette medfører at vi kan optimalisere drifta ytterligare på lokaliteten og innanfor sonene med tanke på fiskehelsevelferd, og for å kunne gjennomføre ein "alt inn – alt ut " produksjon mest mogleg hensiktsmessig. Dette er ei plassering som gjev optimale miljøtilhøve og vil gje vinst mhp fiskehelse og motstand mot parasittar i anlegget. Etableringa av framtidsretta anlegg mhp å tilfredsstilla krav i komande forskrifter, vil også klart vera med å leggja tilhøva til rette for villlevande bestandar. Tilpassing til soneinndelinga vil betra dei langsiktige utviklingsmogelegheitene for nærliggjande lokalitetar og næringa.»

I kommuneplan for Radøy 2011-2023 vedteke 29.09.2011 er anleggsplasseringa hovudsakleg omsøkt i område avsett til bruk og vern av sjø og vassdrag med tilhøyrande strandzone. Føremålet er fleirbruksområde for ferdsel, farleier, fiske, akvakultur, drikkevatt og natur- og friluftsområde, kvar for seg eller i kombinasjon. Seks fortøyingar med ankerfeste mot nordvest er tenkt plassert i areal avsett til akvakultur.

Sidan akvakultur er sidestilt med dei andre føremåla i dette fleirbruksområdet er det ikkje trong for ein eigen søknad om dispensasjon, men kommunen bør vurdere verknaden av tiltaket opp mot dei andre fleirbrukskategoriane i området. I arbeidet med arealplanen er det gjennomført kartlegging av dei viktigaste områda og brukarinteressene som eventuelt vil kome i konflikt med akvakulturnæringa, og i det omsøkte området er det i stor grad opp til kommunen som planmynde å prioritere korleis areala skal brukast.

Tilsaman fire fortøyingar mot sørvest går inn i Meland kommune. Dette område er i kommuneplan for Meland 2015-2026 vedteke 26.08.2015 avsett som kombinerte føremål i sjø. Føremålet er ferdsel, fiske, akvakultur og friluftsliv (FEFIAKFR_1). Inngrep eller tiltak skal vurderast som enkelt saker. Dei kombinerte føremåla gjeld likestilt der anna ikkje er nemnd. I føresegn til arealkategorien står det at tiltak eller inngrep kan ikkje tillatast på stader som kjem i konflikt med fiske-, ferdsel-, friluftsliv- eller akvakulturinteresser.

Dokumentasjon av miljøtilhøva i området ligg ved søknaden. Det er gjennomført miljøgranskningar i form av ein førehandsgranskning etter revidert standard NS9410:2016, og det er utført straummålingar på lokaliteten. I tillegg er ytterlegare dokumentasjon til søknaden som vurderer arealkonflikt med anna bruk og interesse i området, samt i kva grad det vil vere verknader for miljø og samfunn i høve til naturmangfaldlova og regelverket om konsekvensutgreiing utført.

Tiltaket fell inn under vedlegg II i forskrift om konsekvensutgreiingar for tiltak etter sektorlover (FOR 2014-12-19-1758). Søknaden skal då handsamast etter § 3 i forskrifta. Fylkeskommunen si vurdering er at tiltaket ikkje får vesentlege verknader for miljø eller samfunn, jf. Vedlegg III i forskrifta. Dersom berørte partar meiner tiltaket kan få vesentlege verknader, og desse verknadane ikkje allereie er tilfredsstillande gjort greie for i søknaden, må dette meldast til fylkeskommunen innan 4 veker etter kunngjøring. Vi minner om at det er fagmyndigheitene for dei respektive kriteria i vedlegg III som skal vurdere om dei meiner tiltaket kan få vesentlege verknader innanfor sitt område og eventuelt melde dette inn til fylkeskommunen. Det skal konkretiserast kva forhold som bør utgreiast nærmare.

Hordaland fylkeskommune ber om at Radøy kommune vurderer dei delane av søknaden som ligg i Radøy og at Meland kommune vurderer den delen av søknaden som ligg i Meland. Sidan sjølve anlegget som er synleg i overflata og meste delen av fortøyingane ligg i Radøy ber vi om at Radøy kommune legg søknaden ut til offentleg ettersyn, i samråd med søkjar, i ein periode på 4 veker. Søknaden skal i denne samanheng annonserast i Norsk Lysingsblad og to aviser som er vanleg lest i området (jf. Forskrift av 22.12.2004 nr. 1798 om tillatelse til akvakultur for laks, ørret og regnbueørret § 8). Faktura for annonseutgifter kan sendast til søkjar.

Eventuelle merknader frå offentleg ettersyn og kommunen si handsaming av saka ber ein om vert send til Hordaland fylkeskommune snarast råd (*jf. Forskrift om samordning og tidsfristar i handsaming av akvakultursøknader § 4*).

Dersom noko er uklart i samband med handsaming av søknaden, ber vi om at De tek kontakt.

Endre Korsøen
seniorrådgjevar

Brevet er godkjent elektronisk og har derfor inga underskrift.

Kopi: Lingalaks AS